

आकाशवाणी जयपुर-अजमेर

प्रादेशिक समाचार

दिनांक 28.03.2025

समय: 18.45 बजे

- राज्य स्तर रो विकास अर सुशासन उत्सव आज भीलवाड़ा मांय राख्यी ज्यो-मुख्यमंत्री भजन लाल शर्मा कह्यो -सुशासन देश अर प्रदेश रो बरकत री पूंजी ।
- सूचना प्रौद्योगिकी मंत्री राज्यवर्द्धन सिंह राठौड़ कह्यो-आईटी काम लेवण ऊं जिन्दगी बेहतर बणी ।
- केन्द्र सरकार केन्द्रीय कर्मचारियां रा डी.ए. अर पेंशन लेवण वाळा सारु महंगाई राहत मांय 2 फीसदी री बघोतरी कीनी ।
- राज्य मांय आवता 48 घंटां मांय केई ठौड़ां दिन अर रात री बगत तापमान मांय गिरावट रा आसार ।

000

राजस्थान दिवस रा सिलसिला मांय राख्या जा रह्या कार्यक्रमों री कड़ी मांय आज भीलवाड़ा मांय राज्य स्तर रो विकास अर सुशासन उत्सव राख्यी ज्यो । जळसा मांय मुख्यमंत्री भजन लाल शर्मा विकास रा दस हजार करोड़ रूपया रा न्यारा-न्यारा कामों री नींव रखी अर पूरा व्ह्या काम जनता ने सूप्या । चित्रकूट धाम स्टेडियम मांय व्ह्या ई जळसा मांय मुख्यमंत्री यूडीएच एलएसजी कानी ऊं डेलीगेशन रा हुकम , फायर एनओसी रो प्रकिया आसान बणावण, नवा बणायी ज्या जिलां मांय डीएमएफटी बणावण, हरित अरावली विकास परियोजना अर अन्नपूर्णा भंडार ऊं जुड़्या दिशा-निर्देश जारी कीना । श्री शर्मा हर जिला री पंच गौरव पुस्तिका रो विमोचन कीनो । ई सागे ई ई-उपचार एप री सुरुआत करी ज्यी अर पत्रकारों सारु स्वास्थ्य री योजना आर जे एच एस री सुरुआत ई करी ज्यी । मुख्यमंत्री सरकारी योजनावां रो फायदो लेवण वाळां सागे वर्चुअल तरीका ऊं बातचीत ई कीनी । ई मौके मौजूद लोगों ने सम्बोधित करता थकां । श्री शर्मा कह्यो के सुशासन देश अर प्रदेश रो बरकत री पूंजी व्हे है । मुख्यमंत्री कह्यो के चोखो राज वो ई व्हे है ज्यो जनता री उम्मीदां माथे खरो उतरे ।

.....
न्यारा-न्यारा जिलां मांय ई कार्यक्रम राख्यी ज्या । आं जिला स्तर पर कार्यक्रमों मांय राज्य स्तर रो जळसा बतायी ज्यो । राजस्थान दिवस रा सिलसिला मांय राख्या जा रह्या कार्यक्रमों री कड़ी मांय आज पाली मांय जिला प्रशासन अर रोजगार कार्यालय रो ओर ऊं रोजगार सहायता शिविर लगायो ज्यो । शिविर मांय मोटी तादाद मांय नौजवान पूग्या । शिविर मांय 15 कम्पनियां री ओर ऊं जरूरतमंद नौजवानों ने नौकरियां मुहैया करायी ज्यी । डूंगरपुर मांय लगायी ज्यो रोजगार शिविर मांय करीब 300 नौजवानों ने न्यारी-न्यारी कंपनियां री ओर ऊं नौकरी रा प्रस्ताव दिया ज्या । राजस्थान दिवस रा सिलसिला मांय काल कोटा मांय राज्य स्तर रो युवा अर रोजगार उत्सव राख्यो जावेला । इण मांय लोकसभा अध्यक्ष ओम बिरला अर मुख्यमंत्री भजन लाल शर्मा रो ई सिरकत करण रो कार्यक्रम है । ई जळसा मांय सात हजार नियुक्ति पत्र ई दिया जावेला, जद के जिला मुख्यालय माथे रोजगार मेळा अर नौकरियां देवण रा शिविर लगाया जावेला । राजस्थान दिवस रा सिलसिला मांय काल जयपुर मांय अमर जवान ज्योति ऊं रन फॉर फिट राजस्थान राख्यी जावेला ।

000

सूचना प्रौद्योगिकी अर उद्योग मंत्री राज्यवर्द्धन सिंह राठौड़ कह्या है कि सूचना प्रौद्योगिकी ऊं सगळा री जिन्दगी बेहतर बण रही है । वे आज जयपुर मांय आईटी दिवस समारोह रा समापन जळसा मांय बोल रह्या हा । श्री राठौड़ कह्यो के आईटी रे मार्फत सेवा हलका मांय घणा सुधार व्ह्यो है अर वे लगातार नुवा-नुवा काम करण री कोशिश कर रह्या है ।

000

इं मौके श्री राठौड़ अटल ई-गवर्नेंस पुरस्कार ई दीना। कार्यक्रम मांय ई-गवर्नेंस रा हलका मांय बेहतरीन काम करण वाळा अहलकारां रो मान करी ज्यो। ई सागे ई 12 स्टार्टअप्स ने 12 करोड़ रुपया री मदद रा चैक दिया ज्यो। कार्यक्रम मांय गांवाई अर शहरी हलकां मांय ई-मित्र कियोस्क चलावण वाळां रो मान करी ज्यो अर 3 लोकल सर्विस प्रोवाइडर्स ने ई बेहतरीन काम सारू नवाजी ज्यो। दो दिन रा इं आयोजन रा तैत राखी ज्यो न्यारा-न्यारा सत्रां मांय एआई, कोडिंग, रोबोटिक्स अर साइबर हिफाजत मुद्दां माथे चर्चा करी ज्यी।

000

केन्द्रीय सड़क परिवहन अर राजमार्ग मंत्री नितिन गडकरी जैसलमेर अर बाड़मेर जिलां मांय करीब 1 हजार 237 करोड़ रुपया रा कामां री मंजूरी दीनी है। आं दोन्यू जिलां मांय नेशनल हाईवे नम्बर 70 अर 11 ने मजबूत अर चौड़ा बणाया जावेला। उपमुख्यमंत्री दीया कुमारी आज नई दिल्ली मांय श्री गडकरी सागे मुलाकात कीनी। दीया कुमारी बताया के आं कामां ऊं नेशनल हाईवे नम्बर 25, 68 अर 70 जुड़ेला, जिण ऊं क्षेत्रीय परिवहन नेटवर्क मांय बघोतरी व्हेला। आं कामां ऊं हिफाजती दस्ता सरहदी हलकां मांय तेजो ऊं पूग सकेला।

000

केन्द्र सरकार केंद्रीय कर्मचारियां रा महंगाई भत्ता अर पेंशन लेवण वाळां री महंगाई राहत मांय दो फीसदी री बघोतरी रा प्रस्ताव ने मंजूरी दे दीनी है। आज नई दिल्ली मांय व्ही कैबिनेट री मीटिंग मांय ओ फैसलो करी ज्यो। कैबिनेट री मीटिंग मांय करी ज्यो फैसलां री खबरनवीसां ने जाणकारी देता थकां सूचना अर प्रसारण मंत्री अश्विनी वैष्णव बतायो के आ बघोतरी एक जनवरी 2025 ऊं लागू मानी जावेला। इण ऊं केंद्र सरकार रा 48 लाख ऊं बत्ता कर्मचारियां अर पेंशन लेवण वाळा करीब 66 लाख जणां ने फायदो मिलेला।

000

सरकार देश मांय इलेक्ट्रॉनिक सामान बणावण ने बधावो देवण अर इलेक्ट्रॉनिक्स आपूर्ति श्रृंखला ने मजबूत बणावण सारू लिए इलेक्ट्रॉनिक्स घटक विनिर्माण योजना ने ई मंजूरी दे दीनी। सूचना अर प्रसारण मंत्री बतायो के इण ऊं 91 हजार ऊं बत्ता नौकरी-धंधा रा मौका मिलेला। श्री वैष्णव बतायो के सरकार किसानां ने रियायती रेट माथे खाद मुहैया करावण सारू फॉस्फेटिक अर पोटाशिक खाद माथे खरीफ 2025 री साखां सारू पोषक तत्व आधारित सब्सिडी री रेट ने ई मंजूरी दे दीनी। मंत्री बतायो के कश्तकारां रा भला ने ध्यान राखता थकां डीएपी खाद रा मोल मांय कोई बदलाव नी करी ज्यो है। डी. ए.पी. खाद रो 50 किलोग्राम रो कट्टो एक हजार 350 रुपया मांय ई मिलतो रहेवेला।

000

रमजान महीना रा आज जुमातुलविदा है। रमजान महीना रा आखिरी शुक्रवार ने जुमातुलविदा मणाया जावे है। ई मौके प्रदेशभर रो जामा मस्जिदां मांय जुमातुलविदा रो खास नमाज अदा कर र अमन, चैन अर खुशहाली रो दुआ मांगी ज्यी। इं बीच ईद ने ध्यान राखता थकां बाजारां मांय रौनक बध गयी है अर लोगां मांय ईद री खरीददारी रो उमाव निजर आ रह्यो है। ।

0000

प्रदेश रा मौसम मांय लगातार बदलाव महसूस कर्यो जा रह्यो है। लारला चौबीस घंटा मांय केई ठौड़ां दिन री बगत पारो 3 डिग्री सेल्सियस ताई उतर गयो जद के रात री बगत तापमान मांय 6 डिग्री सेल्सियस ताई री गिरावट व्ही। जैसलमेर मांय सब ऊं बत्ती 5 दशमलव 9 डिग्री सेल्सियस रो गिरावट अर्ज करी ज्यी। दूजी कानी धौलपुर अर कोटा मांय दिन री बगत तापमान 40 डिग्री सेल्सियस ने पार कर गयो। राज्य रा 12 शहरां मांय रात री बगत तापमान 20 डिग्री सेल्सियस ऊं ऊंचो रह्यो। मौसम केन्द्र जयपुर रा निदेशक राधेश्याम शर्मा बताया के पश्चिमी विक्षोभ रा असर ऊं पाकिस्तान ऊं लाग्योड़ा जिलां मांय जोरदार बायरो बाजण अर बादला मण्डबा रा आसार है जिण पारो और उतर सके है।

000

प्रधानमंत्री नरेन्द्र मोदी ई दीतवार 30 मार्च ने 11 बज्यां आकाशवाणी ऊं प्रसारित कर्या जावण वाळा खास कार्यक्रम “मन की बात” मांय विचार बतावेला। हर महीना प्रसारित कर्या जावण वाळा ई कार्यक्रम मांय प्रधानमंत्री न्यारा—न्यारा मुद्दां माथे विचार बतावे है। ई दौरान वे खास उपलब्धियां हासिल करण वाळां लोगां अर समुदायां रो ई जिकर करे है। मन की बात कार्यक्रम रो आ 120वीं कड़ी व्हेला। ओ कार्यक्रम आकाशवाणी अर दूरदर्शन रा पूरा नेटवर्क, एआईआर न्यूज वेबसाइट अर न्यूज ऑन एआईआर मोबाईल एप माथे प्रसारित कर्यो जावेला। ई सागे ई ए आई आर न्यूज, डीडी न्यूज, प्रधानमंत्री रा दफ्तर रा अर सूचना अर प्रसारण मंत्रालय रा यू—ट्यूब चैनलां माथे ई उपलब्ध व्हेला।

000

ई साल 1 मार्च ताई आयुष्मान भारत—प्रधानमंत्री जन आरोग्य योजना रा तैत मरीजां ने 8 करोड़ 9 लाख ऊं बत्ता अस्पतालां मांय भर्ती व्हेवण री मंजूरी दीरीजी। केंद्रीय स्वास्थ्य मंत्री जगत प्रकाश नड्डा लोकसभा मांय एक सवाल रा जवाब मांय आ जाणकारी दीनी। वे बतायो के आशा कार्यकर्तावां सारु हाल ताई 10 लाख ऊं बत्ता आयुष्मान कार्ड अर आंगनबाड़ी कार्यकर्तावां सारु 14 लाख ऊं बत्ता कार्ड बणायी ज्या है। श्री नड्डा कह्यो के ई योजना रा तैत 13 हजार ऊं बत्ता गैर सरकारी अर करीब 17 हजार सरकारी अस्पतालां समेत कुल 30 हजार 957 अस्पताल मरीजां ने भर्ती करण सारु शामिल करी ज्या है।

000

इलेक्ट्रॉनिकी अर सूचना प्रौद्योगिकी मंत्रालय रा सचिव एस कृष्णन आज नई दिल्ली मांय सार्वभौमिक स्वीकृति दिवस 2025 रा सिलसिला मांय व्हेवण वाळा कार्याक्रमां रो उद्घाटन कीनो। ई मौके वे डिजीटल फर्स्ट अर डिजीटल ऑनली रा जमाना मांय भारत सरीखा भांत—भांत री भाषावां वाळा देश मांय भाषा री अड़चन नी आवण देवण री ज़रूरत बतायी। एस कृष्णन भाषिणी सॉफ्टवेयर रा महत्त्व माथे ई चर्चा कीनी, ज्यो लोगां ने वां री पसंद रो किण ई भाषा ऊं दूजी भाषा मांय अनुवाद रो सुबीतो मुहैया करावे है।